

秋

室

集

秋室集卷五

文

歸安楊鳳苞傳九著

游大小玲瓏山記

弁山之峰七十有二雲屯浪涌繞郡之北郭鹵距長
城北臨具區其中層崖秀嶂分霄刺天良多清榮峻
茂之趣然未有若大小玲瓏二山之奇特山距臨湖
門二十里而近輯濯抵石林宋葉少蘊之故居也舊
有怡雲庵涵空橋今皆圯玉澗一泓瑩然湛澈迤東
有洞呀然于亂石中大玲瓏之西洞也嵌空窈澗不

可入飛泉瀉磴上琤璫焉跳珠漱玉迸散于石罅間
伏流在其底分注下澗更東行至歸雲洞張謙中題
篆漫漶不復辨識杜牧之葛魯卿林彥政劉無言莫
彥平暨少蘊題名亦無存繼入洞戶隨進隨折兩壁
石益奇火鈴射處目竅魂悸或如劍莖或如弩張或
如蟻狄攫人或如蹲猊或如怪蛟盤挈于雲市行數
十武竇愈小僂身而進少選曠如也又如行空中足
底逢逢有聲微聞暗泉幽修語前互大澗砾而渡巨
石橫塞折而東路漸高嬴旋而上不能窮其止境遂

下循舊路而出昔人云洞天有加巖房各自開戶牖
而回環可以互通惜挾其奧者鮮矣下山遵東麓行
三里許則小玲瓏山在焉范石湖驂鸞錄謂小玲瓏
晚出而加勝而周公謹吳興園林記以錢塘之南屏
及靈隱擬大玲瓏竊意移以品小玲瓏爲尤允范詩
云一邱乃中虛洞穴四無礙卻略巖岫杳黝糾石狀
怪雕鏤具百巧畫圖窘千態可謂善狀奇景者洞有
石巷後山兩崖峭立上互石梁裊裊千雲雖天台不
啻也厓前叢桂蔭泉泉音泠然花時濃馨四山飄墮

金雪游者蹋香而行亦一佳勝范詩又云玲瓏豈見
小孰能爲之大石湖有語卽吾語耳奚煩異其詞爲
爰作記而槩之牘

漢甌硯記

歐陽永叔集錄古文周壇秦碣莫不備具獨恨闕前
漢字劉原父因樵林華宮行鐙蓮芍宮博山鑪槃谷
口銅甬三銘遺之以補其闕而石刻卒無有也迨金
明昌中魯孝王五鳳二年之石出不特永叔不見而
南北畫疆洪氏隸釋亦未著于錄於是論者謂爲西

京法書之首迄今攷之自瓦當而外誠莫有尙焉者是硯斲甄爲之背款分書兩行五鳳元年四月八日八字則又先于孝王之刻矣度以準建初慮僂銅尺長九寸三分強廣五寸三分弱高一寸八分強質堅理膩發色微紫瑩潤類朝天巖上坑之石炎漢搏埴之工之精若是非魏晉已下陶埴之所幾及余每觀趙德甫胡承公尤延之陸友仁諸人致歎息于西漢文字之希有則此甄更足與獵碣文泰山詔相埒近者儀徵阮侍郎藏海鹽五鳳二年甄競詫爲奇物脫

以是硯絜量焉瞠乎後矣

芝英石記

奇石之見于載記者陳隋以上華林之奇僵臨春之
三品瓦官之紫雲寥寂數事而已蓋好之者尠也厥
後搜巖穴岫剔翠曳煙竭人力而輦致之都邑量其
小大以美林園几席之觀若奇章贊皇輩好事代興
宣和花石之役山匠都出吳興吳興諸山皆瀕具區
所謂湖石者爲天下冠而弁山之石嵌空礪塊尤爲
奇秀故由唐宋而來詞人纂述體製大備而賦之而

贊之而銘之而記之而序之而箋之而譜之或詠而
歌之取之秀特者什九取諸瑞應者什一耳歸君啓
鈞新築愛日之廬于舊宅之北隅以爲奉親之所于
市廛老屋中得湖石一高三尺許厥狀類芝名之曰
芝英樹之廬東而屬余記之余攷楚詞多言香艸芝
獨見遺九歌采三秀兮山間王注三秀卽芝秀者英
也郭注爾雅芝一歲三花故爲瑞艸劉氏釋名石者
山之體也九如之頌譬以山者過半今君以芝英名
茲石殆卽以祝親之壽乎非僅爲屨杖婆娑物也其

與他人之癖不亦異哉昔吳人朱孟辨得三奇石其一曰玉芝朶王叔明爲作圖而銘之宋文憲繼作後銘然不爲祥徵徒侈恢侷歸太僕秦國公石記云此石旋轉作人舞類韎師所率之舞又云于劉尚書宅得一石形如大旆迎風獵獵髮髯漢大將軍兵至闔顏大風起縱兵圍單于驃騎封狼居胥臨瀚海時也集中又有太行二石西山四石諸銘其曰置一几間分山東西太行崔巍混沌古色不過形石之奇巧亦何異世之好事者流歸君太僕之族裔也世美承志

之堂思子之亭項脊之軒今猶存焉乎否乎庭中諸石今尙無恙乎否乎君試訪之設得其一二焉以配茲石世守勿失可爲石頌矣嘉慶改元六月晦日秋室楊鳳苞譔記

記莊廷鑑史案本末

莊廷鑑字子襄先世吳江人其祖始遷居烏程之南溥家巨富父允城字君唯貢生生三子廷鑑其長也少患瘋疾延良醫治之謂疾愈當損目試之果然廷鑑遂妄以盲史自居其家與故相國朱文肅公家鄰

因購得文肅史概未刻列傳藁本乃招賓朋羣爲增
損修飾而論斷仍署朱史氏又續纂天啟崇禎兩朝
事其中多指斥之語名曰明書輯略書成而廷鑕死
允城痛傷之爲乞故禮部主事李令哲撰敘列吳越
名士十八人爲參閱十八人者歸安茅元銘吳之銘
吳之鎔令哲子初燾元銘子次萊烏程吳楚唐元樓
嚴雲起蔣麟徵韋全祐全祐子一 吳江張雋董二
酉吳炎潘檉章仁和陸圻海甯查繼佐范驂也始天
啟中文肅已雕史概五種大政大訓大事二記開國

遜國諸臣三列傳版心皆雕清美堂莊氏史亦雕清
美堂欲其版式整齊耳順治十七年冬棗成頗行于
世陸查范三人未見書而聞其名在參閱中於是年
十二月各檢呈於學道胡尙衡胡飭湖州府學教授

趙君宋

温州人
拔貢生

檢舉君宋買此書磨勘摘出毀謗語

數十百條申覆學道

按君宋命本學生俞世楨磨勘
俞本姓陳名且升元籍杭州

又列揭於學宮之門允城上下行賄竄易書中忌諱
處改棗數十葉仍然印行又賄巡道張武烈持君宋
私款君宋不敢較而難稍已先是莊拜前巡道王允

祚爲門生已而王官通政使莊籍其聲執以改彙明書呈禮部都察院通政司三衙門檢察而推官李煥斥申文遂有旣經部院檢察便非逆書之語謂事可

銷弭矣未幾李廷樞

字辰玉江甯籍吳縣人順治四年進士翰林院檢討出爲浙江

督糧道或作吳江人誤

吳之榮

旗人

又發其事初廷樞任督糧

道之榮任歸安知縣以對揭贓款各坐絞罪繫獄遇

赦得出二人流寓浙中越二年聞莊史事廷樞買得

初刻書會湖州知府陳永命

旗人順治九年進士庶吉士

其分房

所取士也以書授之謂奇貨可居永命得賂令將明

書版貯庫檢元書還李而李豪無所獲復以書授之
榮蓋始相惡而繼相好又結婚媾也之榮挾以恐嚇
莊氏莊氏恃已呈部院不爲理乃搆於鎮浙將軍柯
奎將奏其逆書允城懼屬府學生徐典字秩三元居籍松江
閒餽松江提督梁化鳳千金梁爲致書禮於奎而事
得解之榮憤親詣莊其其稍餽以解慙莊復訟諸
巡道責令歸旗之榮益憤藉口辭行索贖于董漢策
朱佑明及允城三家董贖以三千金莊朱皆不許之
榮又踵莊朱之門兩家男子走避令僕婦婢女羣出

辱詈之而巡道遣佐貳官率兵役立逐出境之榮憤甚誓雪讐恥入都簽標詆斥語而補刻朱史氏卽朱佑明一條添入書內奏記於願命四大臣上聞命滿侍郎羅多等馳驛至湖州取府庫所貯明書版知府譚希閔順治四年進士蒞任甫半月懵不知逆書云何羅多諷以賂希閔不應遂銜之械允城至都時康熙元年冬十月也允城赴部刑訊不勝毒楚瘐死於獄磔其屍明年正月再命吳戴二滿侍郎之杭讞其獄當之榮之首告也只恨莊朱二人與餘人無仇又夙與令

哲相善故其書毀去敘文及參閱姓名數葉迫執諸
罪人至會城鎖禁於滿洲軍營佑明與君宋同繫一
處佑明哀之曰公爲首先舉發者必受重賞若得救
我全家當以家資之半爲報君宋貪而許之遂云此
書不全姓名亦不真我有初刻全本姓名無一參錯
則以書中無朱史氏卽朱佑明一條故也自君宋之
書出而參閱之十四人時董已前死查范陸三家免罪撰敘之李令
哲皆凌遲死允城在刑部雖已招令哲作敘而未見其文尙可游移趙書旣呈無能置辨矣
又株連嫻族友鄰纍纍滿獄而君宋亦坐藏弄逆書

處斬矣佑明實不豫史事然其家縣清美堂匾文肅
之故物之榮嫁禍卽以爲據亦凌遲死案既定斲廷

鑕棺灰其骸骨其弟廷鉞及其弟子與諸罪人之昆

弟子孫年十五以上者均斬決妻女配瀋京披甲爲

奴希閔絞死羅多陷之也煥甯國人順治九年進士亦絞部院

司堂官懼罪屬殺煥以滅口也煥亦受莊賄爲書吏施鯨伯所誤永

命以元年冬大計罷官行至山東臺兒莊聞事發畏

罪縊於旅店及是追柩至杭戮屍其弟江甯知縣永

賴亦斬妻子並沒入官歸安訓導王兆禎署烏程教

論不數日而事起羅多發莊廷鉞在學拘禁兆禎誤
信諸生五人卽列名參閱中者及縣役艾明甫暫釋
廷鉞之京視其父而允城斃獄中廷鉞收其餘燬至
明年二月南歸兆禎已坐縱放重囚罪絞艾明甫論
斬之榮又質奎徇情匿奏奎不能抵諱出化鳳手書
爲徵化鳳方以平海寇功膺寵眷謂書乃徐曲所僞造
得脫罪而典械至京處決奎以滿人不識漢字免死
歸旗尙衡武烈賂二侍郎及巡撫朱昌祚旗下人始得
免罪復任二侍郎坐廷樞不自首舉杖之將儼罪之

榮力爲辯雪乃貰其罪而斬賣書賈王起蛟

按君宋在黃沙

路書坊買得莊氏所葉明書書坊乃

李姓所開此言王起蛟未知何本

兩廣提督吳六

奇感繼佐恩極力營救至請納已之官易查之罪六

奇平南藩下人故請無不得部議謂查范陸三人雖

不比吳之榮之發覺亦係首事之人依律頒賞於是

之榮得蔭襲拜他哈哈番給與莊朱各罪人財產之

一查范陸亦給罪人之什物器用三人均委之不顧

而去其餘見諸亭林謝山兩先生記事者此不具

顧安全三家記莊史案事亭林謂廷鑑弟廷鑑兄

則顛倒其伯仲貫齋謂廷鑑死其父復招賓客續成不知成書在廷鑑未死前此皆其誤之小者耳若謝山則大誤矣朱文肅作恪茅元銘作錫吳之鎔作鏞柯奎作松魁此名之譌也李令哲官主事而書侍郎府學教授及歸安訓導署烏程教諭是爲兩學官而漏去府學分歸安烏程爲二此官之譌也參校列名皆江浙人而曰江楚諸名士此地之譌也其尤甚者云歲癸卯吳之榮罷官謀以告訐爲功案吳李對揭罷官在癸巳繫獄六年赦免

在己亥首告在壬寅至癸卯五月史案已結矣世
或據三家以證余誤故附錄其文而辨之余文大
類農家陰晴簿雖失記敘之法然頗得當時曲折
情事固不以文筆未逮前人爲媿聊以存枌榆之
故實云西圖老人自記

記李令哲

李令哲字霜回歸安人少有能文聲以長興籍中天
啟四年舉人榜名木實字端木後改今名

按初改本實字木生

最後改今名

崇禎十三年成進士授江陰知縣以廉謹稱

十五年分房得劉曙張星瑞戚藩史燧等皆知名士
宏光時擢禮部儀制司主事國亡歸里徙居郡城宅
後鄰烏盆巷築園名是山以志不忘聖安也因號是
山石嬾與潘天行居貞沈宋圻圻生李夏器不器諸
人詩篇酬和又分選同時郡人詩爲同岑集仲子祊
燾字宏士負才馳聲氣偕莊廷鉞左黃費爾莊夔一
結徵書社而莊費尤爲刎頸交莊氏將梓明書廷鉞
欲廁爾莊名于參閱中又欲費父韞生作序允城惡
爾莊輕佻薄韞生無文名皆不許而屬意令哲遂乞

初燾轉爲之請乃假手同年陶鑄代作焉初令哲營
生壙於趙灣既成夜夢羽士示以絕句云

或謂發地得石刻

虎穴何須蓋陶公首上文茂宗勤行在

或作莫談身後事

慎

勿昧前因不解所謂自作蒼山生壙紀事詩眾謂祥
徵不知預爲陶代作序之讖也獄急時人皆嗾其指
陶令哲曰無益於我徒損彼耳遂堅自認長孫王綸
僞作王姓繼來者免死充軍

實中表陳紫菴之謀

初燾一子年

五六歲乳母負之逃去餘家口悉駢戮於市而費氏

父子幸不列名書中得免其難鑄字子固烏程人

國朝官平湖教諭有坐秋軒文集

記茅元銘

茅元銘字鼎叔花林人副使坤之孫早慧八歲通章句十四補諸生好讀史上下古今聲氣所暨皆四方奇俊之流注名復社同邑章上奏諤臣舉砥行社徐行道周舉澹成社元銘皆與焉順治末歲貢生年幾六十矣授朝邑知縣當莊氏招撰明書元銘與子次萊預編纂之役事發皆罹于禍次萊妻黃氏殉其夫元銘有秋游日記紀崇禎甲戌偕同志九人爲鴛水

海昌當湖雲間婁東吳門之游訪復社名人高者談
性命次者商文字不憚數百里之遠可以見當日諸
君子氣誼之相感如此惜乎其晚節不終韓曾駒人
穀爲作秋游寄尋詩十九章附刊日紀後今並存

記吳楚

吳楚字敬夫西林邨人烏程諸生耽吟詠好鍾譚派
董說稱之嘗偕閔聲選唐詩嶺雲集吳江吳宗潛序
之行於世及楚預史禍聲宗潛悉下獄時以史案係
累者多文士諸人銀鐙狴犴慨賦詩互相酬答皆

無困苦乞憐語後各免歸聲合諸家詩鈔爲團扉鼓
吹編云

記朱佑明

朱佑明自其父以上世業木工其兄始商於楚豫間
居積頗厚兄死佑明又力經營至鼎革之際其門下
估客各思避亂委其貨以去國初商賈不通物價騰
湧數十倍由是家益富一時搢紳皆與結婚郡城張
御史嘉以兄子妻其仲子彥紹佑明奉之甚厚嘉弟
漢性險譎以奉之者降嘉一等憾甚時佑明充浙江

織造局內堂長家居石橋浦臨太湖羣盜出沒其閒
乃召募勇士置軍器弓刀槍礮無不具爲禦盜備也
漢以此與分巡道史儒綱密謀將發爲兵役所泄佑
明立取諸軍器沈於湖史至徧搜不獲而兵役船夫
偶取其上供錦段以去佑明訟諸織造太監盧九德
厚賂之九德疏劾儒綱以朝廷職官強劫御用袍服
罪斬遇赦減等遣戍於是佑明之名震遠邇草菅人
命爲其破家者不可勝計有二女一嫁潘尙書季馴
諸孫一嫁姚掌科延啟之子長子念紹娶仁和王兵

曹羽之妹叔子克紹娶曹鄴金太傅之俊女佑明益恃無恐然終以其居鄰盜窟時有戒心乃買南潯董氏廢第改造費白金數萬壯麗甲于一郡落成時適之俊假歸迎之過新宅張燕數日日以千金爲供之俊歸諸子問朱之新第何如之俊曰在大貨船中酣飲幾晨夕耳又問其故曰若盪湖船卽有名公書榻矣佑明聞而病之值其甥買得朱公國禎家清美堂榻董文敏其昌書款書朱老年親臺天然巧合遂送佑明縣之廳事禍所伏也及逆書獄起已約以十萬

金賂巡撫朱昌祚僅流徙一身不累家口既而王羽
又屬管理南關旗下人圖賴通吳戴二侍郎關節賂
省而悔前議昌祚大恨告二侍郎曰朱佑明家富耦
國外閒喧傳賚銀百萬賄求免死但之榮巨猾恐被
首發禍反及身矣言未既而圖賴至吳戴立謝之迨
對簿之榮復質其家見有清美堂榻更何辨獄遂定
佑明磔三子與姪繹先皆戮惟幼子得戍邊籍其家
珍寶無算眷屬悉隸關外妻徐氏吞金以殉是時之
俊予告家居亦不能庇其女云佑明雖冤然其人亦

不足道余附此記蓋爲世之富而不仁吝而出納者
戒

書孔孟文事

孔孟文者字元章父爲瘍醫名襟海不知何許人與
湖州郡城西門外郁大和者友善遂寓居焉襟海死
孟文爲僧于長興弁山之土穀祠往來諸山寨中游
說於時魏雪竇爲東門令史凌祥字贅堦聯絡山海
思得一當與思谿錢纘曾允武爲密友以故孟文得
交于二人後孟文盜劫一僧舍事敗二人皆薄之孟

文昵一沙彌貌姣好祠之隣近有貢生潘龍基見而
悅之會孟文犯淫戒遂發其事于官知長興縣事葉
文鳳責逐出境外乃挂褙于龍華寺爲堂頭元素位
下知客改名雪林一日龍基至寺孟文哀之不聽復
揭其短于元素以是不容于叢林遂徧于交游乞助
資裝允武雪竇以其屢敗檢也予之稍薄孟文嗛焉
遁至温州得海中倡義者確耗并內地通海者出入
徑路遂假稱是海中大帥某某皆出某麾下又偽造
一冊云儲精屯某島士卒營某嶼戰艦泊某壘因與

服有隙脫身來投誠是時

章皇帝初晏駕顧命四大臣秉政鎮江將軍劉某在
領數年無寸功方奉 嚴旨戒飭思立一奇功以自
結于四大臣孟文服僧服去襟袖作馬上衣狀投劉
標下劉問狀孟文言海外之難平皆因內地之人運
糧餽資軍裝爲之接應耳內間去外寇可立破也劉
喜卽疏題驛召孟文至京師 陛見賜弓刀裘馬寵
遇甚隆當初首告時尙圖訛詐故舛其名以錢允武
爲錢雲五魏雪竇爲魏西斗潘龍基爲潘倫吉浙撫

以無其人覆部時在順治十八年辛丑夏也而錢魏不知省未及行賄于孟文越半載遂易真高注明地址行鎮浙將軍柯奎密拏矣是年十二月將軍發旗下披甲五百人捲至魏錢已先逸去僅執龍基赴杭允武跳身至晟舍閔氏畱一宿閔兄弟俱連坐瘐死于獄又至南潯朱少師文肅之孫某許遂被執朱亦坐絞雪竇遁之山陰祁氏爲邏者縛去三家俱籍沒妻子流徙次年壬寅康熙改元之二月錢魏潘三人皆被慘法死于杭祥宇坐絞復株繫允武之族人价

人亦論死右據潘居貞菊旃日記及無名氏湖城大獄記二書述其大畧如此

按謝山謂孟文自延平來以蠟書首告乃襲溫晒園南疆逸史之誤又謂事在癸卯則更謬甚又祁六公子墓碣銘則云壬寅首告而竹垞貞毅先生墓表云二人坐慘法死在壬寅六月朔皆非也蓋發難于辛丑夏結案于壬寅春耳嘉慶八年癸亥二月十五日西圖老人記于東城里小谷口寓舍是日老人五十初度之辰也

書李元旦事

李元旦如皋人侍郎之椿子也魯監國時官御史時入中土爲間諜而之椿避亂遠遊寓家嘉興吳祖錫許因吳移寓湖州施鵬舉之烏山及沈仁叔之化石墩元旦常往來二家之間有謝庭蘭者變童也與元旦嬖妾通李覺而毒殺其妾庭蘭跳身京師鬻于內府爲銀工製栢笋之屬鏤刻極精

下缺六
十餘字

臣江南人習

知海寇事皆內地人爲之響應四處聯給故猝未能下耳卽臣所知者揚州有前禮部侍郎李之椿同子

元旦出沒海上齋劄歛饗有某某等皆授偽職此其一也事下所司執之椿至江甯入見總督郎廷佐曰身爲前朝大臣國亡應死久矣兒子受國厚恩死亦恨晚若其所言不足信遂默不一語下獄七日不食死與元旦同僇者四十八人皆庭蘭所舉發也祖錫遜入洪承疇幕中以免魯藩授鵬舉工部主事亦幸而得脫其僕之力也

書鮑辛甫遺事

辛甫宰長興前後十有六年清真澹蕩廉潔自持山

水友朋嗜若性命異乎俗吏之爲後有續湖錄循良傳者舍斯人其誰與歸吳興集劉郎泊詩敘云長興縣治東北隅有池焉廣不踰晦清可鑑也池心爲亭又南厓際連軒數楹以略約達之列植美蔭森布檐隩舊爲賓游契集之所余前宰斯邑距今六閏解舍荒落迴異疇辰惟盈盈小水與前軒相望亭已圯橋已斷遺基蒼鬱望之宛如島嶼然歎津逮之無從矣乃取劉夢得元都觀詩語字池曰劉郎泊字軒曰前度軒綴以格詩一章刻石池側縱人有時而去軒有

時而積池有時而堙塞而掌故之集峴首之碑可以

流傳不朽

雍正辛亥秋七月書

詩曰亭館荒涼已半摧池心孤

嶼鬱崔巍行藏偶爾成前度面目于今尙本來水鳥
樹林皆說法兔葵燕麥若爲媒不妨題作劉郎泊閒
話昆明劫後灰泊與軒而外曰宛宛丘曰俊逸亭曰
博山臺曰鑿坯洞曰兼山磴曰坐樾軒曰停橈館曰
小舟萍牀曰木偶峰曰梯榭合之成十二景爲小菴
園篆刻于石柱作詩云園林周密記石柱魯公兩同
是吳興地還須掌故收此邦存息壤他日老菴裘根

祇堂中植陽冰筆力適復續四景日容與橋曰檀欒
徑曰竹棚曰花闌皆有詩在集中是時名輩過從流
連晨夕投壺散帙啜茗圍碁花朝休暢之詞雪夜登
臨之繪種鞠荷鋤之作采蓮盪槳之歌篇什傳鈔豔
傳吳下今去辛甫時六十餘年池館已蕪廢矣每讀
毛澤民東堂記輒興梓澤平泉之感世之縮銅符者
多虎而冠也如辛甫豈能再見邪

書凌孝女事

孝女凌氏者故明大理寺卿忠介公某世從孫女也

父某早逝事母張至孝歲在旃蒙張病診孝女省事
嘗藥夜不假寐者半月及張歿之日疾已殆不能鬢
踊疆起奔喪次而孺子泣醫者僉謂心傷不可爲越
九日遂卒年二十有二于是鄰里戚懿競稱之余聞
之肅然曰當世縉紳之士執親喪而飲酒而食肉嬉
笑無異平時衣鮮衣出游都市後房歛笙竽變童妓
女裸戲于繆幕間見者恬不爲怪其又甚者則夤緣
起復無金革之變而墨經視事泯焉無復有人心者
皆是也彼凌氏一弱女纖兒耳至不忍偷食息以自

全蓋天性也又可以見忠介之家法乃或者執滅性
踰禮繩孝女詩不云乎鮮民之生不如死之久矣吾
意蓼莪之詩人非必僅託諸言也設後此竟以哀毀
死其不見斥于聖人決矣毀而危身豈禮之訾哉余
里有沈氏某宦閩之侯官愛小胥范貴攜以偕歸某
子服未練夜開宴召優伶給事貴卧牀不應流涕曰
貴死矣主人之喪在堂而燕樂乎又閩人王大槐者
與范同隸于沈以哭母嘔血數升死斯二人者亦不
可謂不達于禮也昔歐陽文忠傳長樂老書李氏斷

臂事以媿之余編香二青衣踵孝女後以告世之號
爲知禮之王公貴人者於戲士大夫被服儒者曾女
子儉從之不若夫非盡人之子與不仁之極也遂至
于斯與

侯雍瞻父子紀畧

侯岐曾字雍瞻震陽季子少奇慧年十一與兄峒曾
岷曾補諸生學使者表其廬曰江南三鳳及長博覽
工文重氣節敦行誼吳門婁東雲間壇坫角立岐曾
調劑其間相與振興古學獎掖後進主文章名教之

柄者三十年順治丙戌以匿故人陳子龍被逮巡撫
土國寶陰使人致酒脯曰汝湖海無名待家信通得
不死岐曾曰我已無家何信爲遂受刑子元沆元洵
元泓與峒曾子演潔滌羣從自爲賡和有土谷六龍
之譽沆字記原幼聰穎祖震暘家居與子弟論李可
灼紅丸事沆甫九歲侍側請曰楊漣旣與方從哲同
被召在內庭當進紅丸時何不面諍而願從眾出宮
門乎震暘大奇之稍長補諸生與弟講求經世之學
期達於用而沆尤忼爽有志節落落自喜嘉定之以

銀折漕米也著爲令甲久矣崇禎之季流寇告警議者復令輸五萬餘石以佐軍興士民苦之十五年沔與張鴻磐詣闕疏陳嘉定素不產米連歲大饑人相食之狀朝議韙之如所請是年中順天鄉試乙榜明亾不復應舉老居秬園因以自號始沔歸自京師知國將亾盡出其室甯匱具易金歸諸祖母龔請白塔田二頃將往耕之筮得震之剝筮者曰未可行也沔曰否子遯也非進也來也非往也不往則無不利也子爲長子成卦皆動宜與婦行也變而碩果宜得獨

全也互曰禴祭受福所謂不喪匕鬯又曰吉大來互
之之曰黃裳元吉所謂大來也且吾資于婦上承王
母黃裳居尊王母當之矣吾其行乎訖如筮言暮年
遭疾復命筮之筮者曰是兆也是爲出于死門泣笑
曰向者震之剝所謂出死門者也今已矣不可復出
矣遂卒嘗論易乾坤二卦曰世之衰也所向无可
剛直者乾主于剛然繼之以健中正又繼之以純粹
精蓋必如是而後可以剛也坤六二之動直內以敬
然繼之以方外以義一本乎柔順中正蓋必如是而

後可以直也不然恃吾血氣而不撓不摧吾能免于
悔吝乎蓋晚歲所得如此洵字文中早卒泓字研德
號掌亭更名涵字中德少補諸生博習經史落紙輒
萬言從弟澗亡命有司名捕之泓挺身代繫久之事
解寄跡吳市一時名士推主文社少與伯仲及羣從
迭受經黃瀆耀而泓尤爲瀆耀所引重虞山稱其筆
力老蒼見知真正云

潘京慧韓茂貽紀畧

潘爾彪字京慧崇禎丙子舉人嘗在吳易孫兆奎軍

中兆奎被執時爾彪卧病王錫闡家及聞變從床上躍起若將赴門者門閉不得出乃繞室疾走至夜半以手擊案而絕

韓繹祖字茂貽烏程諸生史閣部開府揚州以繹祖爲禮賢館士南都破魯王監國于東江繹祖與同邑諸生費宏璣張萼盛德清諸生蔡子標長興金鑑及布衣王光祇起兵先迎黃蜚于湖閩六月三日夜據郡城尋敗去繹祖性強毅少有才名與沈簡討榮爲友其據郡城也簡討亦佐之著有詠性堂遺集

朱柏廬紀畧

朱用純字致一崑山人集璜子年十七補郡諸生越
二載遭國變痛父殉難卽棄去恨不能效王哀廬墓
攀柏因號柏廬以志哀覃精理學於六經四子濂洛
關閩之書探索融會務在躬行實踐隱居教授資脩
脯以養母康熙戊午或欲以博學宏詞薦致一以死
自誓作朱布衣傳以見志門弟子來學者先授以小
學近思錄舉業外別立講約闡發經史晚年作輟講
語示人曰中庸成已成物罔弗由誠然所謂誠者不

外乎倫常日用之間今人心中不脫卑鄙二字倫理上只辨得苟且二字以此讀書豈可語于聖賢之學雖日事講貫奚益哉其箴砭後進嚴切如此嘗謂古者士始入學必釋奠於先師而今之司訓者漫不之講亦思我爲人師而忘其所自始之師可乎乃于歲之春仲率生徒行之家塾灌獻鳴贊拜起如儀生平嚴以律躬不欺暗室每日晨興必謁家廟莊誦孝經一篇病革命設先像扶起再拜以平日所著刪補蔡虛齋易經蒙引及四書講義二書屬其子曰謹藏諸

筭吾將以此見先人于地下復語門弟子曰學問在性命事業在忠孝言訖而逝年七十二時戊寅四月也弟子請于前輩楊先咎私謚孝定先生

吳孝靖紀畧

吳翱字扶九生而穎悟莊烈帝立凡閹黨悉置于法翱與同志孫道等四人勸爲復社義取剝窮而復也太倉張溥舉應社以合之海內知名士皆聞風而來翱於邪正是非之介確然不可易時相溫體仁方柄國屢招致翱卒不應同邑呂純如要一往見亦終不

得以是爲忌者所構遂疏于朝幾陷不測賴倪元略
等疏解之得免翽孝友明經當入試以親疾力辭親
喪哀毀如禮愛諸弟至老愈篤好獎後進故交之貧
困者爲設館授餐衣食其家終無倦色戊子己丑閒
歲大饑出粟賑濟全活甚眾所著有讀史存信存疑
兩帙升恆堂集十卷其卒也四方會唁者千餘人援
文中子例以爲爲親而謝世榮比陶靖節之義私謚
爲孝靖先生奉神主於三高祠祀之弟翽字振六少
負才名著有陸石子詩集四卷

孫孟樸沈聖符紀畧

孫淳字孟樸嘉興諸生少負詩名天啟七年秋與吳
翮吳允夏等同舉復社時韓敬爲兩浙領袞淳獨與
之忤失溫相體仁意其黨遂具疏傾陷復社以錢謙
益張溥張采暨淳爲社魁疏中有網羅天下豪傑二
手握定朝權等語以觸上怒賴邢彪佳倪元璐等具
疏其誣得解復社實自淳首倡一諸生能奔走天下
士名動至尊事亦奇矣淳藏書數十萬卷著有梅綰
齋詩二卷

沈應瑞字聖符諸生少負才以詩文名與孫道等同
舉復社乙酉後絕意進取當事舉賢良方正力辭不
就生平篤于友誼周人之急無倦色給事熊開元遣
戍定海迎其家居于別墅解橐以濟尹職方民興于
危皆爲人所難卒年九十五

孫若士紀畧

孫元凱字若士崑山人崇禎時與太倉顧麟士常熟
楊子常並以諸生持文柄爲詩崇昌黎古文詞嚴峭
近柳子天性高介學綜古今明于治亂嫻于掌故慨

然有經世之志福王南渡史閣部開禮賢館辟主其事至則陳兵事七策不能用具題予職辭不受入國朝閣臣陳名夏言于朝將薦入宏文館力辭乃已隱于東皋研究濂洛之目標經權傳務窮突奧學者宗之顧亭林嘗論書有云棲遲負郭猶懷柳畔之門歷落江村誰問蘆中之士嗟乎追韓公命詣亮草廬倘有意其爲人豈無說以處此此節士襟懷可謂相知以心者矣

吳氏四子紀畧

吳振遠字日千一字石仙號武夷吳江人爲諸生時
卽以經濟自許魯藩過吳問吳中豪傑或以振遠對
乃命指揮張某求之振遠往謁舟中語悅授以工正
振遠固辭不允以母病乞歸吳易孫兆奎之舉兵也
振遠亦部署里中子弟爲一軍魯王擢爲監軍僉事
晉職方郎中易敗走軍亦散去丙戌春易復起大
兵蹤迹之事連振遠乃遣兵卽其家縛之去至蘇州
大帥欲降之不屈死

宗潛字東籬

一作里

振遠弟兄七人竝有才藻而宗

潛與宗漢宗泌尤知名宗潛負經世之學酉戌閒往
來南都東浙數蹈危險振遠之執宗潛時在魯王所
既而知事無成幅巾歸隱遂與同邑有郡邑文士而
高蹈者結驚隱詩社歲以五日記屈原九日記陶淵
明除夕祀林君復鄭所南宗潛常爲祭酒後十餘年
以序人選詩觸忌諱遂與同事者係獄時相倡和有
園扉鼓吹編久之得釋遂隱于醫著名茗雪閒治疾
不問貴賤惟當事招之必不往人謂其通而介年七
十八卒

宗泌字鄴仙爲人強毅能辛苦以身殉義奮不顧家
意有不得則發之于詩思致深沈音節道美得中唐
人風格竟侘傺以死

宗漢字廣平歸安諸生弱冠讀濂洛諸書慨然志聖
賢之學學使者許豸嘗書其文後曰忠孝人也崇禎
季年連遭父母喪哀毀骨立及聞莊烈帝變哭泣至
淚盡乙西南都亾吳易黃蜚並起兵宗漢往來二人
閒論議終不合乃歸佐其兄振遠別成一旅爲聲援
丙戌春振遠被執宗漢宿僧寺得免未幾賓客豪傑

復來集欲推宗漢主其事會江東敗 大兵來躡遂
散去時宗漢得疾憤眩家人載匿湖濱既甦驚起欲
自裁或語曰此非死所謝皋羽鄭所南可法也宗漢
泫然流涕曰然則吾守吾節耳甲午冬疾劇呼兄子
炎曰視吾髮膚無玷于地下差不恨耳炎請遺命宗
漢曰父子兄弟相勉爲善而已遂卒年四十一其門
弟子私謚曰貞孝先生

曹石霞紀畧

蘄州顧黃公景星哭石霞詩曰麻衣掩淚滴泉臺老

友曹生信可哀一別三年頭盡白雙親萬里哭重回

深閨錦字何時寄

龍姬蕭小玉後來毀容守節

隔夕青楓有夢來

君去交游逐仙鬼人閒零落鄴中才

石霞近來好亂故云後哭

石霞詩敘云允昌字石癖更字石霞麻城人崇禎十

二年鄉試第一十六年進士授嘉定縣知縣不事吏

治左遷福建照磨轉入雲南順治八年潛歸里內院

洪檄致軍中佯狂謾語醉吐汗洪茵又以詩誚之遣

歸益放浪託於佛仙父某前永昌府判卒於官順治

十七年雲南始入版圖允昌扶病奔喪甫入境有文

氏七歲兒迎呼允昌名誦其闈牘曰我汝師也己卯
主試章正宸我是也與君同行矣無何兒殤允昌奉
父母之喪并挈明滇南督學黃岡何閔中樞至昆明
病劇卒家人慮道遠寄置何樞允昌輒重不發其弟
曰兄爲何公樞也邪昇何樞至數步又止其弟曰兄
爲何公先輩且客也前何樞乃發予聞其事作後哭
石霞詩康熙九年七月二十七日記詩曰紫府韓蘇
未足疑九泉杜鄭盡交期君親恩重生難背滇嶺跳
還死較遲白馬望中猶待友黃泉歸去亦尋師孤臣

墓誌知誰託卽事還堪野史題自注東坡見夢於莫
養正爲紫府押衙韓魏公紫府眞人也石霞亦降乩
云興章先生皆紫府判事事畢當生山東云要之石
霞才具不羈重氣節敦師誼身際國亡而自放於繩
檢之外狂歌謾語假諸佛仙是亦禰正平之流亞也
余故輯其軼事著於篇以爲後之治古文者要刪焉

歸恆軒紀畧

歸莊字元恭號恆軒崑山人震川先生之曾孫文休
之季子也少通五經工法書善墨竹爲人嗜酒豪放

不羈每試必攜酒以入一日文成襍正草隸篆書之
學使以爲怪黜之旣而惜其才復焉乙酉六月邑人
殺署令閉城拒守元恭豫其謀俄城破亡命髮髡髡
而僧帽衲衣往來湖海閒必負其先世遺像遇諱日
令節束芻以祭後益縱酒狂歌長篇短詠揮灑淋漓
用以寄託無聊而銷其飛揚肆眚之氣得者奉爲拱
璧晚年儼居僧舍飯不足則啜糜襍以菜蔬謂人曰
齏鹽清夢穩而今而後不復問人世酸鹹矣有恆軒
集山游詩類皆激楚之音其落花詩自序畧曰落花

之詠昔偁二家自明以來詩人倡和動數十篇然諸公皆處順境推激風雅鼓吹休明雖遇衰殘之景多作穠麗之詞卽有感歎不過風塵之况憔悴之色而已我生不辰遭值多故客非荆上常動華實蔽野之思身在江南仍有大樹飄零之感以至風木痛絕花萼悲深階下芝蘭亦無遺種一片初飛有時潸淚干林如埽無限傷懷是以摹寫風情刻畫容態雖前人詣極嗣響爲難至于情感所寄亦非諸公所有云葢自傷其身世如此

呼德下紀畧

呼谷字德下崑山人幼時穎悟絕人顧瑞屏愛而亟
傅之聲名籍甚初名簡在國變後謝去諸生更今名
遜跡荒郊足不入城市者二十餘年諸達官以時造
廬卻騶從徒步至門拜于牀下起居外欲有所將以
爲壽竟坐不敢出諸口也詩情閒淡其首夏園林云
物物迎鉏長時時繞徑刪引藤初上樹放竹欲侵山
又谿谷南風變琴書靜日過全家依筍蕨幽夢積藤
蘿誦之栗里風光宛然在目錢蒙叟見其南燭詩歎

爲絕倡期一見不可得葉文敏讓獨賞集併爲東南
隱士之冠有蔡園集初德下自以其姓癖宗支魁少
舊譜殘缺乃由江湖返歷關陝繞汾晉抵幽燕考其
世系不得從齊魯歸于咸甯趙村遇諸生呼延會初
詢其先呼也云其從父謚以單呼無徵綴以延領鄉
薦德下曰劉向列仙傳酈道元水經注並載呼子先
升仙事又宋史徽宗時有將軍呼慶使金議和何謂
無徵會初乃復本姓參訂其宗譜焉吳赤溟有送德
下游五嶽敘詞甚壯余因錄其文而綴其事於首俾

後之讀德下文者亦畧知其梗概云

秋室集卷六

詩 五古

歸安楊鳳苞傳九著

闕逢執徐之歲晚泊橫塘過慈感寺側尋賈耘
老浮暉水閣遺址

斜景皺瀟漪柳根繫行艤風月如有待引人隨步履
緬往蒲魚陂水檻迤邐接清詞寫清景花草記蒙拾
雲白山自青百年等交睫當時梅澗韋已歎付浩劫
香阜闕古今窅窳傳於堞微颺送仙梵散籟松墮鬣
廢興證沽禪寂寥振歸袷回睇波鏡中露冷雙荷葉

同王五

翰青

施二國祚

陳三

珽

游蓮花莊

城居厭喧卑興劇事幽討竭來月湖西邀侶探別島
縈紆徑蘿轉眾木竦牌纛倒景如雕鏤羣漱互環抱
面面紅扶渠霜天映馬瑙夕嵐隔城落濃騰翠於埽
秋容媚林塘十步一畫橐澄觀雲水間豈必由意造
永懷松雪翁茲焉搆蘭橈風篁寫琴心辭翰抒斧藻
翻招山澤譏無地藝香草遺館莽榛莽往躅已莫考
撫衷悅禽魚矯首叩商皓慙歎同心人何年結鄰保

月湖曉雨寫望

寒雨漲溪淥曉色搖菰蒲到眼如撥墨濃渲烟水圖
癡雲不穿漏一桁山影無但聞刺篙聲和以魚翠呼
清景迫我晷寸管難追摹碧翁借粉本遠師米於菟
天靈萬壽寺是陳武帝章后故宅二十四韻

蒼弁抱北郭靜如女嬋媛叢流匯清霄執掣羣龍奔
導氣城北隅紺宇蟠地根駮駮禮殿左四翼交衢騫
蹟仍永定舊銘乏徐碣存神龜上昇久後星隕昆侖
飽聞長爪后秀毓茲里門英雄本天助淑儷非奧援
脫身跋如囚燮隆萬乘尊廢置獨斷纂統徵翰藩

更鑑投璽涕椒親絕朱軒事異漢家雉業華邨氏嫵
到今懷臄地坤靈耀風播哀哉奈何帝王氣塵霾昏
可憐便房啟烟目遭剗智東去崇禮鄉南望嘉陵園
真真翠虬駕盜歸奉先墀紫光一徘徊仿佛雲旗翻
閱人華嚴劫資賞誰復論虛寮歛古豔石幢雙兀蹲
俯檻簷蔔林曾霑翔衣磨勝彼辱井眉土花沍淚痕
臨池悟眾妙敷坐忘囂囂喧破禪瑞蓮朶尙綴臺繁
旃蒙大荒落之五月二十一日重游蓮花莊

嗜好與俗殊山水敦夙慕蓮莊淨明瑟朋探不厭屢

窈窕渚中渚一讓一回互九曲類剡原旋折香篆路
林木生夏寒晝陰忽如霧昔人侈亭沼觴詠迭游厲
勝躅嗟已墟風流曩堪溯試問三品石夕陽幾回暮
欲招折肱莘點染邱壑趣乞與鷗波盟澹然證心素
秋槩撥蕢花牽船岸上住

望昇山

暝霽澄極浦歸雲冱疏林檇楫肆遐眺烟際橫丹岑
微茫辨木末中有樵徑深孤亭出高蹇密竹圍蕭森
內史去我久夕翠留至今未展經濟懷百年悵登臨

嗟余役塵勞空持抱山心茲焉戀佳賞一昔如羈禽
衰回候圓月慨然吟復吟

舟夜

歸舟邁方塘水宿傍回激月黑津鼓歇風生漁鐙聚
獨客耿不眠蘆梢夜深語

昇山館曉發

陰霞絢遙岑疏星涼在水膠角聞荒雞旅榜乘川駛
濛濛遠人村烟樹紛以靡前津朝隰開遙見詭魚市
月夜泛舟郭外望道場金蓋諸山

叢雁排圓沙冷葭偃湖甸低蓬冒淒颼拍瀆復撇旋
霜岸氣折絲篙師股爲弁是時月輝激莽蒼展遙眄
淪波訝鑑虛凍雲忽席捲羣岫兀如睡銜斗時隱見
孕烟抱冬心欽翠皴鬼面寒光試畫格寫影挂嬌扇
得非翦吳刀空明開匹練吹蓬曳羽衣仿佛黃樓宴
夜色帶淖潦城烏繞檣轉沿緣伫望久皓口恐難戀

杭州靈隱書藏紀事

冊府珍典墳爰稽秦以上周官內外史東京職守藏
柱下實司之其名古莫抗石渠與蘭臺更革徒虛矣

溯自隋唐後慈氏忽剽掠石倉慨儒家乃欲以意扞
中丞今巨宗士林咸欣仰持節浙東西雅意勤搜訪
正學追許鄭精讐邁歆向愛古不薄今雕鐫集工匠
流播及來茲母使嗟淪喪靈隱古梵宮瀕湖最幽曠
春淙瀉紅泉鷲嶺環碧嶂於此羅墨莊烟雲足供養
香山寄東林風流昔者尙學士腐書來私心竊相況
拾遺轉藏儲文苑廢龕傍丹書銜佛膺壽世眞無量
偷戒桓氏厨私鄙米家舫列架標籤題排比如屏障
官印記朱鈴熟紙事裝潢難經鉤厥元攷史貴其當

百家無廢斤，薈叢資醞釀。甲乙分部居，縹緗飭撰搆。
玉軸襍琅函，投送勞相餉。紀載收蠟車，纂編揭覆醬。
大哉著述林，頗借佛力仗。龍象儼護持，楞伽爲陰相。
山僧劇蕭閒，開函驅脈望。崢嶸借秋閣，昕夕參梵放。
書櫃芸葉香，禪榻茶烟颺。當與貝葉經，千秋永無恙。

觀棋用韓孟鬪雞聯句韻

四座靜無譁，兩雄怒相待。始縱作雁斜，漸進散霞彩。
堅壘欲受降，逐利竟忘殆。驟振執忽衰，乍厭勇仍在。
刺僚匈交鉞，戮嘉手鏃。鐵守隅，願安偏圖中。宜更塏。

橫攻靡長城得寸收塊磊圓陳劉難支增竈虞已改
初疑穹垂玄更詫雪紛囀吳旣快蒙豪蜀亦誇亮倍
出奇或浮瞿恃勝宵就醢入月共目傷阻水秀腹餒
且復厲前茅慎勿陷左給借助夏庚辰致師晉己亥
稱兵固無名聲討如有罪志險井陘阻機深河水浼
固圉力制貪豢敵巧遺賄一丸豈封關四征非表海
擊瑕期破堅示懈恐乘怠爲謀防未然成功所以乃
遂令局鬪枯亦擬博賜綵彼強良歡愉此弱亦衍凱
聊同藺下廉寧比敦走隗變化寄尺坪神明出真宰

韋論信非虛，交譚故可采。

松靄山房

禪窟才數弓，繞廊竹萬个。暖翠浮林端，綠陰蹋不破。
微風松際來，五粒樅然墮。童子喜攤經，頻伽善偵邏。
何必參香鐙，蕭蕭絕塵堞。仰觀竹垞書，擬作三日臥。

香爐峯

匡廬昔夢到，秀削金芙蓉。開先及三峽，飛步無留蹤。
遙天落奔瀑，倒瀉香爐峯。覺來一恹怳，耳畔猶淙淙。
我行上竺路，碑兀雲盪匈。佳名非忝竊，望若潑黛濃。

陰陰九夏雪謾謾千年松徑思踞林杪輕身倚疏筇
東南渺江海淨洗塵埃容對面莫能卽古道下夕春
山風送歸客隱約飄魚鐘凝情枉遐慕回首浮嵐重

秋夜長十曲反王元長詞

秋夜長夜長會未長紅薺留帶罥寶瑟觸鞋僵
秋夜長夜長心不長滿絲連葉斷梧子逐風颺
秋夜長夜長衾更長龍須休卷席翠羽竟空牀
秋夜長夜長醒後長雀窗看墮月鴛瓦聽殘霜
秋夜長夜長夢正長因風驅塞北帶月度遼陽

秋夜長夜長歌愈長筋怨須終拍軍行未轉章
秋夜長夜長聲益長警霜同唳鶴泣露和啼螢
秋夜長夜長髮亦長舊蒜浦難料新蓬飄易曩
秋夜長夜長思甚長憶初羞點暈念乍戲遺棠
秋夜長夜長恨又長魚鱗空腹素鵲墜枉心香

送沈大謙後一日卻寄

同岑昨已別征旅凡幾舍烏啼練塘秋鏡吹京口夜
遙想翦江船落帆楚雲下

稊詩八首

端居覽羣書憂思忽而積
寒裳出門去晞髮江潭側
我非遷謫人胡有枯槁色
少年當遠征仗劔周八極
安能守章句氏首供偪仄
鵠雀搶榆枋翻飛不盈尺
黃鵠橫四海萬里乃一息

干將未離匣世目同鉛刀
卞玉未離璞難免荆國嘲
鳳皇或在笈曾不如雀翹
騏驥令捕鼠曾不如狸號
庸夫拘耳脈曠士任所遭
白雲自無心舒卷臨絳霄
虛堂曖將夕明月升華林
素輝交入戶照我壁上琴
撫弦不成弄曲古音非
今舉世箏琶耳祇堪鄭衛淫

掩抑復何語濁醪知我心

芎華映桂竹離離滿衡湘眾芳自爲國榛蕪何由戕
羣正常相扶孤立恆多殃一蹈蒼葦室廉潔徒謹將
種莠致稊附刈蕙蘭亦傷懷哉洞先機未事圖豫防
灼灼園中華萋萋岳畔草各以顏色矜樂彼陽春好
金行令一司零落去如埽造物豈不仁植根貴自保
松柏雖有心何知秋風早

平生恥苟得憂患時來牽非好與世忤但求中心安
飢不食跖粟渴不飲盜泉寧爲直幹伐不作曲木全

上觀太古初混沌鑿欲死中觀三代時禮讓斯爲美
末世競錐刀爭端從此起淳風日益喪狂瀾孰能砥
堯舜禪天下巢由尙洗耳

喬柯多恬翮奔湍多躁鱗飛潛本無知智者慎立身
息交寄槃澗願言辭要津相期采芝侶庶得完吾淳

黃龍洞

叢樾攢佛牆怪藤冒修隄歷歷松風生騷屑作人語
呀然陰竇開涼翠滴如雨神物化何年猶餘雲一縷

曉行湖隄至麴院園亭

遙巘開宿雲重湖曉如練爽氣入秋衫意行隨所便
柳搖露未晞葦折鷗先見初暹麗層樓碧瓦明積霰
水檻依臥虹澄波揩鏡面魚翠忽驚飛蓮衣落片片
稍覺塵事隔益知清景戀吾生貴適志誰與鬢不變

瑪瑙寺

名藍面湖曲背嶺陰壑攷何爲割金地亭館結構牢
致令佛屋窄壞牖秋刁騷殘僧子無贖往事心焉忉
吾飲日觀子破戒米汁逃醒脫稻畦帔醉擁茶色袍
但將草書法狂酣寫蒲萄唾罵掘墳賊飲不霑毒醪

吁嗟南宋亡劫運丁溫韜渡江白雁過行殿紅兜遨
六陵寶氣泄玉燈暗魚膏義士竊悲憤私賄漁者撈
冬青夜鵲唳裂竹山鬼號是時眞伽勢奴視公卿曹
孰敢觸其怒師也實人豪慟深謝吳哭節竝熙珏操
惜哉墮蓮社不博遺民褒程敏政宋遺民錄朱明到
德廣錄皆不載日觀
今放參處共仰宗風高礎古繡石髮泉冷雕溪毛徘徊
徇徑松畔默聽翻雲濤

夜登天然圖畫閣

山月未到戶漁火明沙隄湖波盪橋影流漾西村西

濛濛林表暗杳杳浮嵐低置身極高寒烏下歸雲齊
半空塔鈴語恍若鳴天雞欲呼右田翁寫此臨黃倪

沈石田
嘗寓此

雨中登響水樓

樓西秋聲來樓南潮聲雄雨聲送樓北松聲喧樓東
泉聲樓下起響屨廊岬同嘉陵三百里別殿塗青紅
歌鐘擊窟室鼓角鳴地中突騎磨劒架哀玉硯玲瓏
萬籟有時悄斯境無初終水石轉相激蕭條閒闌風
鏘然五音會足使開凡聾長歎下樓去宵霽秋山空

晚霽

涼雨浣炎雲溼雲曳不定披襟且快意餘雷激松聽
烟開山鳥還綠暗水螢暝遙林吐華月空館四檐淨
花露沾人衣散步竹柏徑鼻觀參苓香愴然心境靜

舟次唐棲

揚舡出烟霧挂席曠游目半規翳平沙微籟盪空淥
蒼蒼江菼靡噫噫渚禽肅飛蕙淩水隈修梁跨溪曲
估客聯方艚漁子持藿竹勞歌鬱不舒積素終何屬
履奇感易睽處眾愼矜獨輕儵泳激波叢灌挺喬木

懷賢此淹留遵道故紆複聿想傳經人爲余矢嘉告

七月二十四日歸大

巒

招諸同人湖舫宴集泊

西冷橋下過竹素園小憇復屨權蘇隄上南屏
觀海岳涑水摩崖書而歸分得風字

澄湖濯秋水一鑑磨青銅羣山忽四畫萬象涵虛空
南屏去尺咫對面無由通佳招得鷗朋勝踐期跨虹
延緣缺瓜艇蕩漾蓮花風觚稜望瓊闕仙梵來珠宮
傾壺醒復醉刺篙西更東幽討清曠樓竹樹何蒙籠
琴臺憶漫士摩崖辨溫公壽藤胷灌木太古留鴻濛

歸權衝狂飈，翩如泛鳧翁。譚諧襍射覆，舍人詞媿窮。
水磨頭寓樓襍詩十五首

聞昔白石生，避諠館水磨。漁隱換頭銜，慢詞夢窗賀。
金屋鈿雁箏，閒情不能洩。伊予蹋槐黃，低首方夏課。
屢寓詩仙居，騷雅慕流播。三復伯子解，妙語洗寒餓。
蘆葉吟夜商，荷雲打雨破。好景故宛然，弱才媿難和。
敢據百尺樓，看山且高臥。

看山與聽水二者斯，樓兼奔雷牖。震盪染黛峯，穠纖
激激到欹枕。蒼蒼橫軸簾，靜諠本無住。物我非有嫌。

心虛徹眾妙境冷袪紛炎兀坐竊私語卿乃何不廉
旅夢不暇長愛奇不敢宴澄懷事夙興萬象坐中見
缺月帶山郭曙河颺輕練積水霏乍開遙林露猶泫
逡巡上初瞰涼雲曳成片樓臺灑金碧巖渚靄蔥蒨
寓目忻所希寫悰俗自遣懷哉愜幽諾卽景俄幻變
曩來候秋蚤御葛含風輕振策兩峯頂飛步三隄平
岳花落如霰迤邐蹋香行今來候秋遲輒與炎毒撻
局脊一樓上積然儼中醒涼臺不得擢露漿莫由擎
予豈襍穢子聲利交蠅營何爲競觸熱經禮千佛名

追思昔遊好望岫心徒傾但挂馬曹頰朝爽熨眼明

苦熱墮甌如樓居豈能好鼓楫湖心亭盟鷺恰前導

月地啟廣寒何須夢裏到

若把西湖比明月湖心亭即廣寒宮周起渭句

輪突如來炎轡浮于埽傲傲人柳眠嚶嚶露蟬噪鱗

鱗眉岫低皎皎鏡波照矚映心無營智仁理各造就

船鬪酒槍莫辭接離倒

湖面飛雨至推窓失南屏俄頃翻月峽極視連滄溟

隱几體自適握葵手暫停豈惟洗熱惱幸已舒勞形

同飄入午夜檐溜如建瓴重雲掩昏黑天水空杳冥

漁火四三點閃閃流涇螢高城聞譙鼓習靜無撻甯
茗熱折足鼎花香缺脣餅倒身作甘睡薤滑珊瑚青
商量蠟阮屐曉山步鈴屨

陰巖曦晷匿女牆望舒起湖練鋪金波影入鎖窗裏
把酒對碧翁遙空淨若洗真趣不外求賞弄輒私喜
霧澹鷗渚明霜濃鳧華菱涼翠紛四山時時滴杯底
朗詠香巖詞風流聊復爾

筱飲澹蕩人才名冠秋榜書畫詩備擅三絕世鮮兩
穩汎白度航遺榮得真賞簫管載兩頭吳娃打蘭槳

江花沙柳閒吟嘯任還往斯人今已無湖山日塵埃
維有白練禽溘溘拍波響

腰鼓三百副對山娛暮年琵琶四百軸升庵稱老顛
嬉酣失意後才士自古然夢樓雅顧曲頗得荆劉傳
脫身宦海外跣脚明湖壖歌伶蓄小部勝日開賓筵
燈昏笛版急月冷甃甃眠賦詩當纏頭不啻十萬錢
風流起遐慕今昔感倏遷西去舊莊路寂歷凝寒烟
王夢樓太守罷官後攜雛伶一部寓小牖西陳氏莊
日集四方名士畫舫聯吟燈樓度曲極昇平之樂事
寂寞湖山頓爾生色今不
可再矣每過之帆生惆悵

問訊草衣宅，澗陽段橋東。水聲瀉環佩，落色淒房櫺。
昔時玉臺格，清若湖上風。競爽有宛叔，披豁鍾譚蒙。
才華擅絕世，迺墮平康中。西陵美人去，不見桃花紅。
年年作寒食，蜂蝶捎成叢。

貧閨傷旅巢，千載惜皆令。崢嶸卻聘語，嚙然冰雪淨。
橐筆朱門趨，飢驅不足病。晚歲來石函，雲山借畫幘。
破除水墨痕，腕力益豪橫。天涯念流落，悽惻託歌詠。
士女有如斯，文人莫論命。

南北兩紺塔，對峙霄漢舉。黃妃積醉翁，保叔宛靜女。

檀園判非誣斯語卽吾語頗羨慈恩游往偕高岑侶
側想淩虛無蒼然規平楚天造金琅璫無階苦旅拒
徒具曠土懷攀登鎮未許愛茲斜照閒雙影一樓貯
雲居寺岩亭秀色落斜楫笋鞵未曾履咫尺悵縣邈
圖繡望疏林離離挺梢擢遠勢收眾峯東俯城一角
朝夕學眼食忘餐對蛾緣不如練遊心栗杖精舍卓
隔歲修玩事小泊三潭隈水枕山俯仰風船月徘徊
米囊覆背冷鐵笛橫雲哀望秋鬪韻險得句雕瓊瑰
延緣未知返鷗鷺相驚猜歸來捲簾看八窗洞達開

夜色愈娟好，漱澹搖深杯。狂吟坐待旦，疑有笙鶴陪。
今宵結璘玦，挂鏡不上臺。凭闌展四望，滿湖堆溼灰。
欲和去年曲，古月安在哉。

將去山水窟，遲月重登樓。坐深不辭倦，戀此一宿留。
踰時皎魄上百頃，鎔銀浮波光。拾金墓隄影，眠黃虬。
今夕勝昨夕，爲問仍圓不。餘輝照無睡，破曉歸帆抽。
山作離別色，掩抑螺子愁。水作離別聲，幽咽龍吟湫。

白沙泉

平沙濫泉脉，夾澗鳴淙潺。旣漱我里耳，亦鏡我塵顏。

惜不得修綆夜與茶僧閒
嘯時約便了調水符當頒

登寶石山絕頂晚至天然圖畫閣二首

山勢作驥奔到此勒飛鞚
浮圖屹高標奮翅九霄鳳
攬身凌其巔飄搖天門狃
爽秋淨纖翳決背豪末洞
絕壑旋驚飗萬籟激箭伸
四覽懷以曠孤往好殊眾
回首夕嵐沈歸雲澹羃空
顧返赤華舍清冷梵音送
飛閣峭壁銜駭從天墜下
俯視百尺淵危于峻棧架
林氣晴霧蒸湖光涉欄瀉
面南啟山窗蔚然羣峯迓
峯峯霞際明縹碧冷交射
昔游得未曾叩檻發奇詫

靜言消暑佳，綠雲滿浮榭。準擬招鷗朋，來茲結僧夏。
南山卽事

南山秋欲來，刻畫露巖骨。峭壁高攢攢，波濤漲溟渤。
排比屏風張，夫豈可超越。甫到探林霏，已覺消苑喝。
蜿蜒蘿洞穿，巉巉落磴滑。百折梯上方，危峯特孤揭。
側身接阜雕，回首叫烟鶻。空拳挽天弓，平視齊日軌。
猛飈無時無，烏下雲出沒。俄頃魚鱗收，海嶠青一髮。
彌令曠士懷，豁達埽蓬勃。澄湖乍隱見，裊裊興愈發。
思訪琴臺蹤，遙看執突兀。起蹋落葉堆，清鏘響深樾。

歷呼猿龍泓玉乳青林射旭諸洞

崖垠鬼斧劈戶戶石扇開其中宅金仙列坐周四隈
漏痕壞色古崩剝生莓苔鑿非吳越工禍豈妖僧胎
咸淳志可證俗說休浪猜理公飯猿處疇昔鳴聲哀
彷彿月明下客行三峽來出洞復入洞龍泓更奇怪
神物倏還往泄雲爲徘徊釜縣玉乳竇白潤如蜃灰
窅深青林穴怪石岌欲積仰窺射旭景綫露幽光咳
靜覺豁茫味萬象咸昭回緬思五丁闢力懈手未推
一罅不容補亘古噉黔雷題名闕六七師相眾所哈

襄樊已危困，廖阮猶追陪。
運終紅羊劫，毒餘翠珉災。
慨然傷錢趙，王霸安在哉。
祇有穹壁佛，長踞青蓮臺。

靈竺道中

仄囂卻朋探，幽屏成獨往。
浩兮憺忘歸，適爾愜遐想。
攀崖徑非捷，越澗蹊豈枉。
日落眾峯陰，秋空百泉響。
蕭騷緒風善，縹渺澹霞上。
遲遲去心眷，歷歷來目賞。
舍闕青蘿扉，行輕赤藤杖。
昏旦候已變，遷延一敞罔。
上張光徑未至庵而返

巢鳴甲西山，屐齒阻經歷。
微吟白公詩，夢境卜良覲。

餘勇誓造幽一規快搜剔浮嵐隱半規涼雲滿巾舄
峯環竹林深烟翠紛可摘筧引泉令令籜解秋槭槭
廢以松檜杉濃陰厚如積歸鳥赴山光喚人理回策
豈曰興已盡惟防夕始極事因畏蕙敗功爲頓萃劇
破光或有靈想羞對殘客未能御風行甘比退飛鶴

飛來峯

嵌空太始雪纖列非一古想當鑿鑿時百靈運斤斧
斲成小玲瓏合署空青府孤縣綴花跗隋立挺蒿柱
虎牙刺天門鼈背潑地乳林藿森緜濛盤拗絕寸土

于時隕微霜丹黃絢襍俎豈惟說今情兼以追昔覩
何年鷲峯來迢遞程莫數得無移愚公或疑鞭夸父
不脛走且僵無翼飛轉怒誰道重驅回龍象力孔武
良趾鎮不搖神化虛可度物理靜有常納芥亦何補

廡樓漫興

朝山作

去聲

青眼對水盟素心耽此良不惡曷用冠華

簪緬然睇秋色高唱諧清音蕩囂擁懷遠觸境隨趣
深逝流續來往積影橫古今吾自樂吾樂匪以煩
襟且寄樓上臥濁醪時一斟

集雲庵

見山弗思靜

見山思靜齊邛子語

青山還笑汝白雲世莫爭消

領諒我許深入心忘疲躡屨更驚舉松陰趁人行澗
響響客語短籬出禪關荒寂竄蒼鼠老僧野猿如約
略具賓主佛香閒不管虛煩長者煮妙供妒羅縣歸
去懷褻貯遙指日銜峯翳翳下平楚

永福寺

爰辭靈峯庵返照下西嶺竹風吹客衣石徑入寺永
吟策拄回廊頗覺心地冷龕燈僧眼碧一禮金粟影

到此息塵勞何殊沃州境小品雖未諳微言或堪領
從師乞禪榻結願事幽屏

望石笋峯

久懷鄴公庵出寺蹋磴畧秀筆勢參天夾道帶稠木
銳上峽兮北宛中繚而曲前闕惑故溪冥緬俯幽谷
鐘聲落峯雲傾聽役遐矚不見漆版扉空思祖龍學
超臺嗟已平石笋尙如束孤根拔地起特立不諧俗
捧龍拏衙衙干霄拂雲足竹秋無古今山僧安敢劇
夙性愛林泉與世異蠶蜀僂道輒引去毋迺太拳局

終當造霞表還期後游續

坐令泉亭

對面圍岳屏層檐溼空翠飛泉縹西來不用佩刀刺
厖作晴雷鳴颯如駛雨至少選窺淵渟熨羅碧無膩
苔衣石閒孕林影波底媚魚行空所依我樂於斯寄
遨床坐移晷塵垢滌冷粹終古此泓然誰云有時澌
上發光徑至庵覽昔賢留題墨蹟

山行憇竹陰一徑綠無暑斗峻不知倦靜聽澗泉語
禽言墮峯頂仰覓在何處螺旋上益高歷境凡幾許

半壁銜僧房梯空翼然舉越岫列禪榻江雲宿方礎
流觀昔人詩陳迹問香侶矯首赤城霞微茫下海嶼
攷光僧舍卽事

入山無遠近歷歷穿翠微竹光清我心嵐碧染我衣
但聞澗聲響始悟人迹稀老僧道邊輅一笑忘塵鞿
邀客青精飯款客白板扉

晨詣清漣寺納涼坐池上觀魚

夙生味禪悅每參佛子家矧當暑餘酷旅次紛囂譁
宵夢墮靈境券驢曉策搥芝隴幽且窈細路縈秋蛇

到寺梵放靜息闕如退衙香穗地波律僧影臨枯楂
涼颺拂池上疏柳搖鬢髻繞廊不敢唾淨綠浮檐牙
空明古方鑑肯受纖塵遮媿隅逐羣戲喙喋依楚苴
堂堂復唯唯永免中猎义或額點濃黛或鬣凝丹砂
片或白于蜃媵或碧似鴉檣蒲疊碎錦荇帶漂听霞
乳以青精飯腹書想勸加穴此玻璃界得名水校花
濠梁悟魚樂妙旨通楞伽彼眼水母借奚容演三車
林隙日規吐陰移亞闌斜坐久心轉寂笑寔咸池瓜
上風篁嶺尋壽聖院不得謁龍井歷楊梅隄片

雲石諸勝四首

山靈吾石交秋賦輒相訪
竭來款岳扉岑碧故無恙
賈勇作孫升紆行屢謝仰
青壁若無梯盤折神愈王
寸寸檀欒秋攢圖託霄上
蒙密緣扶闌微罅巒翠障
蕭颯戛風韻萬緣葛衣颺
抗懷退休人撫跡識超曠
殊庭莽榛芳叢薄迷所向
泉聲引幽步瑱擬拊修沉
一泓瀉陰哈闌石積苔厚外
鮮豪悍脇內祛靡曼誘
中乃涵空青精氣結寒瀏
潛蚪媚幽深鱗而戢切膠
愧乏環咒術小衷探領手
雪髓不待淪觀心妙無垢

苑粦試嘗之甘冽過旨酒按經品名泉孰可出其右
陋彼桑苧翁棄遺等覆甌無味以爲味得稱知味否
挹泉散沖衿愛憫笠亭左竹禽催客歸欲去且敷坐
細審漫士碑掣筆含婀娜陷牆損纖波翠墨拓尙可
紆回循曲廊接澄平不頗繚垣斷崖口青削峯數朶
徑轉楞栴林幽隴夕烟鎖悔不臯月來吳鹽攜一裹
丹成火始然蜂采香欲墮綺巒繡壑閭飽啖我家果

江文通楊梅頌鏡
日繡壑照霞綺巒

峻坂斗上下沿緣息辛筋商意到虛谷屑然如有聞

劃開見山帶託地檜秋雲何年觸石起留此一片雲
得毋應霜節鬼舍垂星文又疑涌萍鄉玉女衣繽紛
眷言謝塵鞅冷臥非烟氲踟躕不忍別揮手雲中君
取道出崑厂半嶺明斜曛遄歸數厯妙持以樞宵分

虎跑寺茗會

一徑松陰涼日光午不漏藤格開竹房落花拂襟袖
泉眼窺禪心證空三飲後妙手點茶人何緣鶴骨瘦

虎頭崑弔施梅川墓

崑岷寶巖右是名虎頭崑上有昔人墓香骨埋玉函

仰觀契心許拾級凌巖巖梅亭久并塌梅圃餘空嵌
模糊覆夏屋冷落斜陽銜臨安盛詞客岳也名相攬
楊李薛周輩文采驚愚凡唱酬協同調味不殊酸鹹
湖山管風月箏笛女手摻賓朋泮宿草佳銘削譏讒
千秋一片石泯沒如夷芟越江龍蛻去何況詩翁劖
詠懷聿佇望暝色攢松杉

曉起渡湖泊金沙港循隄折而西過明昌化伯
墓道詩二首

月墮澄湖明露涼西山曉輯濯過壓隄疾若輕鷗矯

微聞藕花香波遠翠蓋小斯須艤金沙暹噉上林杪
島嶼浮淪漪亭榭翳松篠開顏抗森爽適意忘幽眇
隔澗恣遐觀嵐氣青未了一抹遙天低朝霞絢蒼縹
步履輦路西鳥嘯喚山店繚戾行人稀草露光閃
閃古隧石獸危摧崩土花豔摩挲讀殘碑文藻特華
贍恭聞秦陵初椒畹此縣窆第無赤墀奢葬有黃屋
僭驟乘禍或萌徹廟語徒驗足徵漢家衰不爲明祚
黍桑海劫屢更奉香使莫覘翁仲本無心與壞豈關
念悵望松暉冥鬼燈碧於染

行徑桃源嶺下入西山來第一佳處

仙源孰津逮昔聞武陵漁茲嶺襲其名可有秦人居
生悔誤章句墨守窮三餘逝將舍故業學稼從濁沮
嶺下足犁田嶺頭足架廬案堆賈勰術肘繫汜勝書
芳春候花時紅雨出荷鋤開臘會鄰保周禮猶釀與
泥飲互酬勸脫略儀節疏世事不挂口渾然太古初
王侯與將相此樂恐未如蓄願冀得遂對面重躊躇
秋賦之杭廡許氏湖樓卽事有作感舊懷人語

無倫次

贖帖試又屈溫卷邀吾徒未勝巨鼇戴敢矜摘領鬚
聯襪交有道盍簪德不孤相將挂帆至來占高士湖
於時變金素紅苞猶芬敷撐船度雲錦浮拍同汎鳧
谿香挾山色迎客與之俱到門不問主合并快莫逾
劇談忘日趨一一如連珠商略辦銀角牽率追詩逋
垂楊藏水樓樓外練影挂萍居領佳要不負清淨債
開襟謝塵櫻引睇破天械綠葑雙鳥眠烟林晚蟬喝
餘霞檐角收涼雨樹頭灑湖山本禪窟色空長不壞
省院與臺諫浪云可典賣同調三五人昕夕接情話

共入宗炳圖臥游寫清快羣峯納窗櫺了了如讀畫
檐聲雜櫨聲蕭寥滴旅枕蚤起衣不船展眺覺噤痒
風棱散澌澌雲族寒淦淦浩如墮烟海莫辨沙際錦
行都歌版地迎酒轟夜飲但聞失晨雞三商媚香寢
誰知破清曉賞雨發孤唸手仇玉壺春呼童煮鰕瀋
醉看懔懔山畫評米家品忽憶江漲橋溼帆送還沈

謂沈均麓基還
沈借用南史語

沈髯從賦來趣裝一何急偕行有季重

吳蘊
蔥珩

瘡苦同

命楫二君負恢奇驂駮脫羈馭掇科視芥如慕恃掩

廚及造物非忌才挫賢意偏執故遣水帝子潛軍暗
相襲遂令戰藝人瑟縮蟲戶蝥乘剛揲豫貞受福占
井汲枚叟文莫發花卿句難拾遼海哭秋風臨歧爲
於邑

水樓夜逾寂湖面搖輕烟天空星芒大四照山蒼然
隔岸寺鐘響飄落驚鷗眠前塵玉湖口觸境悲逝泉
阿兄健詩骨與我駢詩肩雙笛傲公濟百詠追靜傳
聯吟每達曙回首二十一年夜臺儻相憶寄語上慎旃
凭闌哽無荅邈絕蓉城仙微聞斷雁叫噫噫青蘆邊

積陰壓湖曲竟日烟霏霏旅館近漸瀟落痕上人衣
拖屐不出戶所惜過客稀撥悶俯修楯已失山四圍
放眼到雲外空濛嵐影微一重更一掩乍覲復乍違
白鷺飛破處遙見漁艇歸遠心自近得私賞或公非
他時謝三郎掉首脫金鞵雨篷帶笠省梅嶼相因依
客愁雨夜長厭聽儼船屋漏殘雨亦止霽色上窗曲
案戶曙漢斜柳桁暗如幄初陽遙堞升遠近成麗矚
鬱縊淨宿霾碧巘新出沐亭亭盪空明濃黛鏡斂蓄
孤懷彙眾妙夙契獲新淑境移岫嶺莊興墮烟霞峪

側想最高頂一片秋可矧及茲曉晴開縱攬海氣綠

異落翼同岑卽蓮爲掘藕講德余抱慙竊追四子後

張君開濟才佐幕厯棋久縱論天下事斧柯不在手

張訪

歸君癖書林家學辨科斗筆蹤貴肥環千兔禿

如帚

汀鸞

陳君格方雅霜竹春月柳

陳春麓

岳君飲

人和啖蔗味醇酒

岳荆門

咫聞豈云多寸長復何有

相示藺氏心永望發蒙蔀

往歲西籟集合如九衢萍旅吟一編在披處寒發硯

琪葩綻狎獵箏玉鳴瓏玲到今各雨散僂指垂六齡

靜者誓撻戶硜硜抱遺經

施北研國祚時
纂周易考異

儋耳壯士

臥蠻花醉魂馨

陳雪甜筵
客瓊州

落拓老詞客高唱留秋屏

歸來應省選又隔嚴城局

王鶴墅翰青新自豫章歸
應省試厲城內清河坊

閒尋香阜壁題墨猶未零哦詩作佛事日短龕燈青

吾鄉富山水清遠圖在昔繞郭蒼弁寒汎輪碧浪拍

奇絕極樂城吳刀澀翦塲持以比西子肯受尹邢捩

夙擬營茅茨小住鄰泊宅結想筆童心流光去如擲

此閒差可樂雅宜題是亦遊愒任終老百年一晨夕

故巢豈不戀滿意卽爲適浮生萍葉蹤何分主與客

今夜秋正中故園風物美入手淺角香堆紫蟹奴紫
團樂坐待月荒廚供菽水往者兄弟偕差得親顏喜
漸歎佳節過愛日曷能已遙想堂上筵奉甌藉寡姊

父曰嗟予季母曰嗟予子迢迢甄胄城

弟擊在金閨

森森

錢塘渙相違雖不遠盼望卽千里各無縮地術悔咎
諒同爾

眾峯赴暝色兩峯爭夕陽片時兩峯晦湖月流清光
水華汎皎潔巒翠生微茫孤雲渺歸岫白鳥依鳴榔
粼粼葦風勁瑟瑟花嶼涼秋意在何許靜覺聞冷香

開簾葛中薄擁膝茶話長相對有共得相賞毋獨忘
以我無盡意取彼無盡藏客心芻幻住歸夢尋橫塘